

臺灣歷史文獻叢刊

臺灣光復五十週年紀念

閩海紀略



臺灣歷史文獻叢刊

閩海紀略

臺灣省文獻委員會印行

臺灣文獻叢刊
第二三種

閩海紀略

中華民國四十七年七月出版

編輯者

臺灣經濟研究室

臺北市重慶南路

發行者 臺灣銀行

臺北市重慶南路

經售者 中華書局

臺北市重慶南路

印刷者 臺灣銀行印刷所

臺北市青島東路

本書係根據臺灣銀行

臺灣文獻叢刊重新勘印謹此誌謝

重刊閩海紀略序（明鄭史料類）

同治甲戌，牡丹社事起，沈文肅公治軍臺南，從郡紳之請，奏建明延平郡王祠，有云：「明末延平郡王賜姓鄭成功者，福建泉州府同安縣人，少服儒冠，長遭國恤，感時仗節，移孝作忠，寰宇難容洛邑之頑民，向滄溟獨闢田橫之別島，奉故主正朔，墾荒裔山川。」寥寥數語，鄭成功畢生志節表露無遺，足抵長篇大論，文肅公之言，真深知鄭成功者也。

昔清人入關，明祚垂亡，義師勤王，後先繼起，死難之烈，遠逾前代，如弘光時之史可法、隆武時之黃道周，以及魯王監國於浙、永曆即位於滇，率皆曇花一現，不旋踵即冰消瓦解，未克與清師爭雄，獨延平郡王異軍特起，支撐半壁東南，傳其子孫，延明祚三十餘年，至今偉烈豐功，猶堪頑廉立懦！

稽諸史乘，王初以一介儒生，慨於君王之蒙難，乃焚襦棄儒，樹招討大將軍幟，藉彈丸之金廈二島以抗清師，二次北征，所到處多望風投降，清廷亦爲

之震撼，迨師阻金陵，功敗垂成，遂驅荷夷而復臺灣，設職官、興學校、佈屯田，百廢俱舉，奈將星忽隕，齎恨以終，其遺恨固至深且痛，然王之精神氣節，則千秋不泯也。

王之先世崛起海上，傳子而孫，凡四世，史料浩瀚，諸如正史官書之載記，大臣將帥之奏疏，文人學士之著述，譜牒碑版之傳狀……等，皆彌足珍貴。各家所記，立場容或歧異，惟鈎玄探隱，歷史真相終不難大白於世，故仍無損其史料價值也，曩者臺灣銀行經濟研究室所刊「臺灣文獻叢刊」，相關史料蒐羅殆盡，嘉惠士林，功不可沒，爰以此為基礎，並新增若干，彙為一篇，重付剞劂，以廣其傳。

本書《閩海紀略》，不分卷，不著撰人，亦記臺灣鄭氏史事，其體裁、內容，大體與夏琳《海紀輯要》及《閩海紀要》相似，惟詳略有別耳。書中由弘光元年乙酉閏六月「唐王即位於福州」敘起，以訖於鄭氏議降、寧靖王闔家殉國止，其中史事有他書所未見者，故或有疑為夏琳所撰者。

余忝掌臺灣省文獻委員會，以職責所繫，並感念長官之期望，無時不以文獻史料之蒐羅、保存爲念，庶先賢心血不致湮滅，而提供學者之研究素材，茲值本輯告成，謹綴數語，是爲序。

臺灣省文獻委員會
主任委員

簡榮聰

謹序於臺灣歷史文
化園區臺灣文獻史料館

中華民國八十四年三月

弁言

這本閩海紀略的情形，與前刊海紀輯要（臺灣文獻叢刊第二二種）完全相同。它的原抄本也存在中央研究院歷史語言研究所，我們也經該所的同意以後，根據傳抄本，參考臺南市文獻委員會的傳抄排印本（簡稱臺南本，見「臺南文化」第五卷第四期）標點、校刊的。因此，有些話，在海紀輯要的弁言上已經講過的，毋庸重述。現在要說的，祇有一點；即本書原抄本並無著者姓名，臺南本由它的體裁與內容，書明也是泉南夏琳的著作，我們則仍照原抄本，不列著者姓名。這因我們編印臺灣文獻叢刊的主要目的，是在文獻的提供；我們不想做考據的工作。至少，做這工作，是另一件事。

周憲文於臺北惜餘書室

閩海紀略

乙酉、宏光元年

夏、閏六月，唐王卽位於福州，改元隆武。

初，唐王統兵勤王，以擅離南陽，錮高牆；會赦，之南都。時靖虜伯駐師京口，邂逅相識。及南都失守，靖虜伯同師至浙，復于江口相逢，遂奉入閩。南安伯與諸大臣會議監國，靖虜伯固請正位以壓衆心；閏六月十五日唐王卽皇帝位。改福州府爲天興府、布政司爲大內，大赦；以漢光武亦乙酉改元卽帝位，因改元隆武。封南安伯爲平虜侯、靖虜伯爲定虜侯；旋封平、定二國公。

平國公姓鄭，諱芝龍，號飛虹，南安石井巡司人也。兄弟五人：長卽公，次諱芝虎，三定國公諱鴻達，四澄濟伯諱芝豹。平國公年少起家海上，崇禎元年戊辰歸誠，授遊擊；屢平海寇、紅夷，累功陞總兵，鎮守福建。甲申年之變，福王卽位南京，封爲南安伯；定國公，卽靖虜伯。至是，唐王卽位；叙翊戴功，晉封爲侯。旋以平虜侯爲平國公、定虜侯爲定國公。賜平國公子國姓、名成功，封忠孝伯。

平國公長子名森，字大木，天啓甲子年七月十五日生在日本國；後遣人取回。

方七歲，有大志，讀書穎敏不群。年十五，補南安弟子員，食餼。省試時，有術士見之，驚曰：『公王侯相，殆非科第中人』；時方銳志場屋，不以爲然。及隆武立，召見；奇其狀貌，賜國姓，封忠孝伯。

丙戌、隆武二年 秋、九月，清貝勒王入閩，誘挾平國公入（都）。

時朝政戰守事宜，皆出於平國公。（公）嘗與文臣齟齬，兵餉日匱；繼聞錢塘信急，決計南歸。于是各□守將皆言缺餉，盡撤兵回。清兵從容由建、由汀、由福寧分道入閩，各處無一守禦；八月，至延平。隆武幸汀，將入贛；詰旦將朝，聞清兵踵至，倉皇登騎而奔，不知踪跡。九月，清兵至泉州；平國公在□□（安平），□□（外通）于海。貝勒馳書招之，略云：『吾所以重將軍者，以將軍能立唐藩也。人臣事主，苟有可爲，以竭其力；力盡不勝天，則投明而事，乘時建功，此豪傑也。且兩粵未平，吾欲見將軍者，欲商地方人才故也』。平國公得書大喜，遂送款行；國姓力陳，弗聽。及見貝勒王，置酒甚歡；忽夜半拔營，挾公北去。

丁亥、永曆元年 國姓招討大將軍起兵。

初，平國公撤兵而南，密諭國姓速歸；不從，曰：『父教子忠，未聞父教子貳！』及公北行，欲俱見貝勒，定國公陰命逸去，乃謀舉義。時兵將、械船百無一備，遂往南澳招募；識者知其可與圖大事，咸歸心焉。丁亥永曆元年（即順治四年）自

南澳同，聞永歷卽位粵西，遙奉年號，稱「招討大將軍罪臣」。以廈門□□（先爲）建國公鄭彩與弟定遠侯鄭聯所據，移泊鼓浪嶼訓練。七月，以洪政、陳輝爲左右先鋒，楊才、張進爲親丁鎮，郭泰、余寬爲左右鎮，林習山爲樓船鎮。建國公兄弟招討軍□□入海澄，破九都城。數日，援兵至，洪政中流矢，諸軍回島。

秋、八月，會定國公攻泉州。

定國公自平國公解兵投清，尙擁兵甲。八月，率所部進取泉州；國姓引兵會之，列營桃花山。清提督趙國祚鎮泉州，每輕視之；二十八日，率騎數百直衝營壘。張進、楊才迎戰，定國公遣林順等夾擊，大破之，追至城下。九月初三日攻城，別遣水師破溜石砲□，殺參將解應隆，軍聲大振。泉紳郭必□□（昌子顯）舍欲內應，國祚殺之，滅其宗，并繫相國黃景昉等。國祚嬰城嚴守，多殺戮，泉民日夜不敢喘息。漳州副將王進（卽王老虎）率兵來援，圍解。

戊子、永曆二年 閏三月，復同安（卽順治五年）。

國姓引兵取同安，守將步騎同九都民次小營嶺店頭拒戰。同安兵奔潰，追至縣圍之；守將廉郎、知縣張効齡夜棄城遁。以葉翼雲知縣事。

秋、八月，清兵破同安，知縣葉翼雲、守將丘晉、林壯猷、教諭陳鼎等皆死之；屠其城。

自丁亥攻泉州，所在蜂起；清之號令，僅至郡城外而止。七月十三日，佟、陳、李三大人援師在泉，義兵皆竄匿。丘晉，林壯猷等守同安；清兵日夜攻城，城陷，丘晉、林壯猷全軍沒焉。知縣葉翼雲、教諭陳鼎皆死之；屠其城。先是，有「同安血成溝」之讖；至是，果驗（同安有書生，綽號鰵魚，善術數。省回，見羅漢山中所稱生閻羅者，值外出；先以摺紙置硯底，生取視之，上云：『鰵魚半途死，同安血成溝，嘉禾斷人種，安海成平埔』。生讀畢悚然。奔回，果至小盈嶺下而死。初，國姓以「斷人種」爲「斷人掌」所謠，皆斷俘兵手掌放回以應之；其後，清兵燬安海鎮城，廈門有鄉名「嘉禾」，語果驗）。

己丑、永曆三年 攻泉州，取之（即順治六年）。

自同安敗後，乃往銅山所募兵；以施琅、楊才、黃廷、柯宸樞、康明、張英等攻漳浦，守將王起倬降。遂由雲霄鎮抵詔安，移屯分水關黃岡；留黃廷、柯宸樞守盤陀嶺。清兵進攻盤陀嶺，柯宸樞兄弟死之。□宸樞，明武舉人。

庚寅、永曆四年 往潮州（即順治七年）。

是年，全粵俱奉永曆年號，土寇隨在橫竊。守潮者，□□（新泰）伯郝尙久也；自定國公入據揭陽，兩家雖同奉正朔，實各按劍。潮人黃海如、陳斌先爲據寇；至是，引國姓入潮。遂入南陽，勦許龍、楊廣等；渡達濠，誅張禮，勦新墟、金田等

寨，悉平之。

夏、六月，擊蘇利。

蘇利在碣石衛，引兵攻之，不克。利後自據，清兵討殺之。

秋、八月，併鄭聯軍。

時兩島尙爲建國公兄弟所據，其北將章雲飛恣肆。國姓密與陳豹等謀襲之，曰：『兩島吾家土地，渠兄弟虎踞橫行，大不道！』自揭陽揚帆，中秋夜抵廈門；定遠侯鄭聯尙醉萬石巖，詰朝酒醒，登舟謁見，握拜甚歡。國姓撫諭之，曰：『兄能以一軍相假乎？』聯曰：『敢不唯命！』先嚴部署，舉砲爲號，諸軍爭先進船，聯衆不敢動。未幾，邀聯宴萬石巖，盡歡而罷；陰伏甲士，道殺之。時聯兵衆船強，國姓將至，其兄鄭彩議全軍出避；不從，復不設備，遂及于難。鄭彩率所部航海而南；飄泊數載，兵衆星散，不敢歸。國姓以書招之，彩得書喜曰：『今不歸，後無期矣！』遂回廈門，國姓善待之；病死於家。

辛卯、永曆五年 春、二月，清巡撫張學聖遣泉鎮馬得功襲島（卽順治八年）。

（國姓）既併鄭聯軍，以鄭芝莞守廈門；率舟師南下，次平海衛。清巡撫張學聖按泉，令泉鎮馬得功乘虛襲島。時定國公棄揭陽回師未至，鄭芝莞無守禦；得功先遣數十騎渡五通登岸，兵民望見，皆奔竄，遂入島。原閣部曾櫻自縊死。學聖及興

泉道黃澍登山，望島孤懸海外，汪洋萬頃；憮然曰：『此絕地也！設有緩急，援兵豈能飛渡耶？』先引回。不數日，定國公至，得功欲退，不得渡，乃遣人謂公曰：『吾不得出，島上人民必不能保全；公眷屬皆在安海內地，無乃不便乎？』公以爲然；又不期國姓之猝至也，縱其回。四月初一日，國姓至，得功已離島二日矣；大悔恨，以失島罪斬鄭芝莞（芝莞，國姓叔也），諸將股慄。定國公退泊白沙，築寨以居。繫左先鋒施琅。

施琅，晉江人；屢有戰功，授左先鋒鎮。有標兵逃在國姓左右，琅擒之。國姓馳令勿殺，至已斬矣；大怒，繫之，逮其家。琅乘間逃去，密渡安平依澄濟伯；國姓收殺其父並其弟，援勦左鎮施顯。琅歸清，鎮同安；累陞水師提督、靖海將軍。夏、五月，入漳州南溪。

自回島之後，申嚴紀律，兵聲復大震。率衆入漳州南溪，鎮將王拜（邦？）俊迎戰，大破之。

冬、十二月，敗提督楊名高于小盈嶺。

清提督楊名高自福州率步騎入漳應援，迎戰小盈嶺；名高大敗，僅以身免。乘勝狗漳浦，守將楊世德、陳堯策等降。

壬辰、永曆六年 春、正月、復海澄（即順治九年）。

進取海澄，是日潮漲，舟達城垣，守將郝文興以城降，授文興爲左都督；以壬午舉人黃維璟、己卯舉人林其昌、丙戌舉人馮澄世先後知縣事。

三月，大敗清部院陳錦於江東橋北。

陳部院先年引兵破同安，有威望，率兵來援；乃簡精銳列營江東橋北大廟待之。部院狃於同安之役，意甚輕視；及戰，大敗，奔回泉州。七月，部院復軍于鳳尾山，爲其丁庫成棟所刺，來歸。國姓以奴弑主，大逆；雖賞其功，陰令殺之。

夏、四月，圍漳州。

進圍漳州，浙鎮馬逢知（原名進寶，號金衢馬）率兵來援，縱其入城。數日，逢知出戰，迎擊之；逢知軍潰，復退守陴。外援既絕，益危戰。諸軍百道攻城，晝夜不休；城中悉力堵禦，不能克。距漳三十里有鎮門曰象鼻，兩山夾岸，築斷，激水灌城，不就；復列柵圍之。城中升米銀數兩，人相食，死者相枕藉。圍解後，署漳守道周亮工收枯骨七十三萬餘，焚瘞一大穴，豎碑曰「同歸所」。其收拾不盡者，不可勝數。

冬、十月，戰于古縣，敗績。

漳郡被圍，中外隔絕。清遣金固山率兵來援，九月至漳，聲勢甚銳；時久圍堅城，師老糧匱，衆無戰志。十月初三日，退屯古縣。清兵追至，迎戰，奔潰；退守